



UNITED NATIONS - UJEDINJENE NACIJE
International Criminal Tribunal for the former Yugoslavia
Međunarodni krivični sud za bivšu Jugoslaviju



Dijalozi o naslijeđu MKSJ


22. - 24. jun 2017.

Sarajevo, Bosna i Hercegovina

Konferencija o naslijeđu MKSJ i kako drugi mogu koristiti njegova postignuća kao osnovu za daljnji rad

Biografije govornika

Dijaloge o naslijeđu MKSJ velikodušno su pomogli Evropska unija i vlade Finske, Njemačke, Malte, Nizozemske i Švicarske.





Sudija Carmel A. Agius služi kao predsjednik Međunarodnog krivičnog suda za bivšu Jugoslaviju (MKSJ) od novembra 2015. Sudija Agius je u MKSJ prvi put izabran 2001. i predsjedavao je nekolicinom predmeta u Pretresnom vijeću II. Od 2010. bio je sudija Žalbenog vijeća i na MKSJ-u i na Međunarodnom krivičnom sudu za Ruandu (MKSJ), a za potpredsjednika MKSJ-a je izabran u novembru 2011. Sudija Agius je kao potpredsjednik služio četiri godine, nakon čega je izabran za predsjednika. Sudija Agius predsjedava Odborom za Pravilnik MKSJ-a od 2003., a niz godina služi kao član Kolegija MKSJ-a. Godine 2010. i 2011., koordinirao je rad na izradi nacrtu Pravilnika o postupku i dokazima za Međunarodni rezidualni mehanizam za krivične sudove (Mehanizam), koji je Savjet bezbjednosti Ujedinjenih nacija prihvatio, a sudije Mehanizma usvojile. Prije nego što je izabran u MKSJ, sudija Agius je bio viši sudija na Apelacionom sudu Malte i Ustavnom sudu Malte, a u nekoliko navrata je bio i vršilac dužnosti predsjednika suda. Godine 1992., služio je u Odboru za izradu Pravilnika za malteške sudove.

Dr **Serge Brammertz** je tužilac Međunarodnog krivičnog suda za bivšu Jugoslaviju i Mehanizma za međunarodne krivične sudove. Prije svog dolaska na MKSJ, dr Brammertz je bio komesar Nezavisne međunarodne istražne komisije Ujedinjenih Nacija u Bejrutu (Liban). Od januara 2006. do kraja 2007. dr Brammertz je predvodio istragu o ubistvu bivšeg libanskog premijera Rafika Haririja. Godine 2003., dr Brammertz je izabran za Zamjenika tužioca Međunarodnog krivičnog suda, gdje je bio na čelu Istražnog odjeljenja Tužilaštva koje je vodilo istrage o zločinima počinjenim u Ugandi, Demokratskoj Republici Kongo i Darfuru (Sudan). Prije nego što je izabran za zamjenika tužioca MKS-a, dr. Brammertz je, kao savezni tužilac Kraljevine Belgije, koordinirao brojne istrage i suđenja koji su se ticali organizovanog kriminala, terorizma i kršenja međunarodnog humanitarnog prava.

John Hocking iz Australije je pomoćnik generalnog sekretara Ujedinjenih nacija i obavlja dužnost sekretara Međunarodnog krivičnog suda za bivšu Jugoslaviju (MKSJ) od 15. maja 2009. On je sekretar MKSJ-a koji je najduže na dužnosti, budući da ga je generalni sekretar Ujedinjenih nacija dva puta ponovo imenovao na tu funkciju. U periodu od 2012. do 2016., g. Hocking je istovremeno obavljao dužnost prvog sekretara Mehanizma za međunarodne krivične sudove. Gospodin Hocking počeo je raditi na MKSJ-u od 1997. kao pravni savjetnik na prvom suđenju s više optuženih, u predmetu *Čelebići*. Nakon toga je radio kao viši pravni savjetnik Žalbenog vijeća MKSJ-a i Međunarodnog krivičnog suda za Ruandu. Na dužnost zamjenika sekretara MKSJ-a imenovan je 2004., i rukovodio je Odsjekom za pravosudnu i pravnu podršku do 2009., za vrijeme najveće pravosudne aktivnosti MKSJ-a. Prije dolaska u Ujedinjene nacije, g. Hocking obavljao je funkcije savjetnika za pravna i politička pitanja na nacionalnom i međunarodnom nivou, između ostalog pri Organizaciji za ekonomsku saradnju i razvoj (OECD) u Parizu, nacionalnoj multikulturalnoj radio-televizijskoj kući vlade Australije u Sydneyu i pri Britanskom filmskom institutu u Londonu. Takođe je radio s advokatima koji su se bavili pitanjima ljudskih prava u Londonu i kao pravni saradnik sudije Michaela Kirbyja, bivšeg predsjednika Apelacionog suda i Višeg suda Australije.

Dragan Čović, hrvatski član Predsjedništva Bosne i Hercegovine, diplomirao je na Mašinskom fakultetu Univerziteta u Mostaru 1979. godine. Rad u kompaniji SOKO Mostar započeo je 1990. godine. Gospodin Čović je 1989. godine stekao magistraturu na Mašinskom fakultetu u Mostaru i završio specijalističke studije na Ekonomskom fakultetu u Sarajevu. Doktorsku disertaciju je odbranio na Sveučilištu u Mostaru 1996. godine. Od 1994. godine radio je kao docent i vanredni profesor na Mašinskom fakultetu u Mostaru. Gospodin Čović je 2004.



godine postao redovni profesor Sveučilišta u Mostaru. Gostujući profesor na Ekonomskom fakultetu Sveučilišta u Mostaru je postao 2002. godine, a na Filozofskom fakultetu istog sveučilišta 2007. godine. Član Predsjedništva županijskog odbora Hrvatske demokratske zajednice Bosne i Hercegovine (HDZ BiH) postao je 1996., a 1997. je izabran za predsjednika gradskog odbora HDZ BiH. Od 1998. do 2001. bio je potpredsjednik Vlade Federacije BiH i ministar financija. Takođe je bio zamjenik predsjednika HDZ BiH od 1998. do 2005. godine. Na izborima 2002. izabran je za hrvatskog člana Predsjedništva BiH i bio je član Predsjedništva do 2005. Predsjednik Hrvatskog nacionalnog kongresa BiH postao je 2011. godine. Od 2011. do 2014. bio je predsjedavajući Doma naroda Parlamentarne skupštine Bosne i Hercegovine. Na izborima održanim 12. oktobra 2014. Godine, gospodin Čović je izabran za hrvatskog člana Predsjedništva BiH.

Nakon što je diplomirala pravo i dobila zlatnu medalju za najbolji uspjeh na studiju prava na Univerzitetu u Manitobi, gđa **Kimberly Prost** radila je 18 godina u saveznom Ministarstvu pravosuđa Kanade, od čega je osam godina bila direktor Grupe za međunarodnu pomoć, zaduženu za postupke izručenja i uzajamne pravne pomoći u krivičnim pitanjima. Na tom poslu je, pored rada na redovnim predmetima, učestvovala na pregovorima o više od 40 sporazuma o izručenju i uzajamnoj pomoći i bila je članica kanadske delegacije za pregovore o Rimskom statutu Međunarodnog krivičnog suda, pregovore o Konvenciji UN-a protiv međunarodnog organizovanog kriminala i Konvenciji UN-a protiv korupcije. Bila je i na dužnosti načelnika Odjeljenja za krivično pravo Sekretarijata Commonwealtha, kao i na dužnosti načelnika Odjeljenja za pravne savjete Ureda Ujedinjenih nacija za borbu protiv droge i kriminala (UNODC). Nakon što ju je Generalna skupština izabrala u julu 2006., imenovana je za *ad litem* sudiju Međunarodnog krivičnog suda za bivšu Jugoslaviju. Na toj dužnosti bila je četiri godine, na suđenju s više optuženih za događaje u Srebrenici, na kojem je presuda donijeta u junu 2010. U periodu od jula 2010., bila je na dužnosti prvog ombudsmana Odbora Savjeta bezbjednosti za sankcije Al Qaidi s mandatom od pet godina. Sada je na dužnosti šefa kabineta predsjednika Međunarodnog krivičnog suda u Haagu.

Jennifer Trahan je vanredni profesor u Centru za međunarodne odnose Fakulteta za stručne studije Univerziteta u New Yorku. Predaje sljedeće predmete: međunarodno pravo; ljudska prava u teoriji i praksi; međunarodna pravda; tranziciona pravda; upotreba sile od strane SAD-a i "globalni rat protiv terorizma"; te vodi intenzivne tečajeve na terenu u Haagu, Bosni i Hercegovini i Srbiji, kao i jedan u Ruandi. Radila je kao savjetnik na Programu za međunarodnu pravdu organizacije *Human Rights Watch*, konsultant za procesuiranje događaja u Iraku pri Međunarodnom centru za tranzicijsku pravdu i na predmetima pred Specijalnim sudom za Sierra Leone i Međunarodnim krivičnim sudom za Ruandu. Autorica je dviju knjiga, jedne o jurisprudenciji Međunarodnog krivičnog suda za bivšu Jugoslaviju i jedne o jurisprudenciji Međunarodnog krivičnog suda za Ruandu. Napisala je i veliki broj članaka u pravnim časopisima, uključujući članak o Visokom sudu Iraka, zločinima u Darfuru, te o krivičnom djelu agresije pred Međunarodnim krivičnim sudom. Članica je Vijeća savjetnika Globalnog instituta za sprečavanje agresije; predsjednica američkog odjeljenja Odbora Međunarodnog udruženja pravika za Međunarodni krivični sud, članica Radne grupe Advokatske komore grada New Yorka za nacionalnu bezbjednost i vladavinu zakona i članica Odbora Međunarodnog udruženja pravika za upotrebu sile. Takođe predaje na Univerzitetu Columbia, Pravnom fakultetu Univerziteta Fordham, Pravnom fakultetu u Brooklynu, Novoj školi, te na Institutu za međunarodno krivično pravo Pravnog fakulteta Univerziteta u Salzburgu.

Dr **Eve La Haye** radi kao pravni savjetnik projekta MKCK-a za ažuriranje Komentara Ženevskih konvencija iz 1949. godine i njihovih Dopunskih protokola iz 1977. godine u pravnom



odjeljenju MKCK-a. Prije nego što se pridružila MKCK-u 2007. godine, radila je kao niži pravni referent u Žalbenom vijeću MKSJ-a od 2001. do 2005. godine. Doktorirala je pravne nauke na Londonskoj školi ekonomije (LSE) a magistrirala međunarodne odnose na Višem institutu za međunarodne studije u Ženevi. Predavala je na više univerziteta i objavila više članaka o međunarodnom humanitarnom pravu i međunarodnom krivičnom pravu, kao i monografiju *Ratni zločini u međunarodnim oružanim sukobima* (Cambridge University Press, 2008.) koja je dobila Lieberovu nagradu Američkog društva za međunarodno pravo.

Sudija Hilmo Vučinić postao je sudija 1993. Karijeru je započeo kao sudija Vojnog kantonalnog suda u Goraždu. Poslije toga, raspoređen je u Kantonalni sud u Sarajevu, gdje je ostao do svog imenovanja u Sud Bosne i Hercegovine 2005. godine. Bio je sudija prvostepenog suda kao i sudija apelacionog odjeljenja, na kojoj funkciji je i danas. Sudija Vučinić sudio je svoj prvi predmet za ratne zločine 2003. na Kantonalnom sudu u Sarajevu i nastavio je taj rad na Sudu Bosne i Hercegovine. Kao sudija Suda Bosne i Hercegovine, radi na veoma složenim predmetima u vezi sa optužbama za genocid i zločine protiv čovječnosti. To uključuje predmete koji se odnose na genocid u Srebrenici i predmete MKSJ-a koji su proslijeđeni Sudu Bosne i Hercegovine u skladu s pravilom 11bis Pravilnika o postupku i dokazima MKSJ-a. Pored toga, sudija Vučinić je imao više prezentacija u vezi sa sudskom praksom Suda Bosne i Hercegovine na raznim međunarodnim konferencijama, a predavač je u Centru za edukaciju sudija i tužilaca Federacije Bosne i Hercegovine i Republike Srpske.

Mark A. Drumbl je redovni profesor Pravnog Fakulteta Univerziteta Washington and Lee, gdje je takođe na funkciji direktora Instituta za transnacionalno pravo. Njegovi istraživački i nastavni interesi uključuju međunarodno javno pravo, globalno ekološko upravljanje, međunarodno krivično pravo, te transnacionalni pravni postupak. Bio je gostujući predavač na više pravnih fakulteta, uključujući Univerzitet u Oxfordu, Univerzitet Paris II (*Panthéon-Assas*), Univerzitet u Melburnu, Masarykov univerzitet, Univerzitet u Sidneju, Univerzitet Vanderbilt, Slobodni univerzitet u Amsterdamu, Univerzitet u Ottawi i Koledž Trinity u Dablinu. Njegova knjiga, *Atrocity, Punishment, and International Law* (Cambridge University Press, 2007.) dobila je pohvale Međunarodnog udruženja za krivično pravo (američko nacionalno odjeljenje) i Američkog društva za međunarodno pravo. Godine 2012., objavio je knjigu pod naslovom *Reimagining Child Soldiers in International Law and Policy* (Oxford University Press), o kojoj su objavljeni brojni prikazi i kritičke pohvale. Autor je više od stotinu članaka i poglavlja u knjigama i često je prezentator na akademskim simpozijima, konferencijama, plaćenim predavanjima po pozivu i radionicama. Na njegov rad pozvalo se više institucija, uključujući Vrhovni sud Kanade, Vrhovni sud Ujedinjenog Kraljevstva, američki savezni sud, kao i Vrhovni sud države New York u nedavnim odlukama.

Claudia Hoefler je njemačka pravnikinja koja je radila kao sudska savjetnica Sudskih vijeća MKSJ-a tokom proteklih šesnaest godina. Ona je vođa tima i viša sudska savjetnica sudijama. Claudia Hoefler takođe obavlja funkciju šefice Ureda za pitanja žena, mehanizma za promovisanje veće svijesti o rodnim pitanjima i rodno senzitivne radne sredine. Takođe organizuje program mentorstva kako bi podržala i osnažila žene zaposlene na Sudu. Prije dolaska u Sudska vijeća MKSJ-a radila je kao viši istraživač Instituta Max Planck za strano i međunarodno krivično pravo u Freiburgu, Njemačka.

Michelle Jarvis je advokat iz Australije sa značajnim iskustvom u oblasti vođenja sudskih sporova, vladavine prava, pristupa žena pravosuđu kao i na višim rukovodećim funkcijama. Posljednjih šesnaest godina radi na Međunarodnom krivičnom sudu za bivšu Jugoslaviju (MKSJ), a



trenutno je zamjenica tužioca zadužena za pravna pitanja u Tužilaštvu MKSJ-a i Mehanizmu za međunarodne krivične sudove (MMKS). Michelle je vodila sveobuhvatan program naslijeđa u vezi sa procesuiranjem seksualnog nasilja vezanog za sukobe, što je kulminiralo objavljivanjem knjige *Procesuiranje zločina seksualnog nasilja u nadležnosti MKSJ* (OUP 2016.). Koordinator je Mreže za procesuiranje seksualnog nasilja u vezi sa sukobima (PSV) pri Međunarodnom udruženju tužilaca i vodi obuku za Strathmoreov institut naprednih studija u oblasti međunarodnog krivičnog pravosuđa (SIASIC) u Najrobiju. Takođe je član Grupe praktičara za utvrđivanje činjenica i odgovornosti, član ekspertskeg tima za brzo pravosudno reagovanje u vezi sa zločinima seksualnog i rodnog nasilja i kopotpredsjedavajuća Komisije za ratne zločine Međunarodnog udruženja pravnika.

Kirsten Campbell je glavni istraživač projekta 'Rod pravde', koji finansira Evropski savjet za istraživanja. Ovaj četverogodišnji projekat bavi se procesuiranjem seksualnog nasilja u oružanim sukobima putem proučavanja predmeta Međunarodnog suda za bivšu Jugoslaviju i bosanskih sudova. Predaje na Koledžu Goldsmiths Univerziteta u Londonu. Doktorirala je savremene jezike na Univerzitetu u Oxfordu i pravo na Londonskoj školi ekonomije, a ranije je radila kao pravnik specijalizovan za trgovinske sporove. Objavila je veliki broj radova u oblastima roda, seksualnog nasilja vezanog za sukobe, međunarodnog krivičnog prava i tranzicione pravde.

Adrijana Hanušić Bećirović je viši pravni savjetnik u uredu organizacije *TRIAL International* u Bosni i Hercegovini, čija misija je borba protiv nekažnjivosti i pružanje pomoći žrtvama međunarodnih zločina, a posebno kad se radi o seksualnom nasilju povezanom sa sukobima, u njihovom traganju za pravdom i pravnom zaštitom. Prije nego što se pridružila organizaciji TRIAL, radila je kao pravnik i svoje stručno mišljenje pružala Parlamentarnoj skupštini BiH i, kao nacionalni ekspert UNDP-a za pravne poslove, Instituciji ombudsmana za ljudska prava, a bila je i saradnik Venecijanske komisije Vijeća Evrope i njemačkog Bundestaga. Ona pruža usluge pravnog konsultovanja raznim organizacijama, s naglaskom na međunarodnim standardima ljudskih prava, tranzicionoj pravdi, propisima protiv diskriminacije i pravima žena. Adrijana je diplomirala pravo na Univerzitetu u Sarajevu, a magistrirala je na Univerzitetu u Strasbourgu iz oblasti međunarodnog javnog prava.

Aurélie Roche-Mair je direktorica haaškog ureda Međunarodnog udruženja pravnika (IBA) i u tom svojstvu rukovodi IBA-ovim Programom za Međunarodni krivični sud i Međunarodno krivično pravo. Prije nego što počela da radi u IBA, gđa Roche-Mair je bila sudska savjetnica na MKSJ-u, gdje je radila na prvostepenim i drugostepenim presudama; pomoćnik branioca na Međunarodnom krivičnom sudu (ICC) i MKSJ-u; i pravni referent u Tužilaštvu MKS-a i u IBA-ovom Institutu za ljudska prava. Gđa Roche-Mair je takođe, posredstvom JRR-a (Justice Rapid Response), 2015. godine bila savjetnik za rodna pitanja sudijama Vanrednog afričkog vijeća u predmetu *Habré*.

Stekla je titulu magistra prava u oblasti Međunarodnog krivičnog pravosuđa i oružanog sukoba (*cum laude*) na Univerzitetu u Nottinghamu i doktorantica je na Nizozemskom institutu za ljudska prava i Montaigneovom centru pri Univerzitetu u Utrechtu. Objavila je nekoliko komentara i članaka o međunarodnom krivičnom pravu.

Dr **Marko Milanović** je vanredni profesor Pravnog fakulteta Univerziteta u Nottinghamu. Diplomirao je na Pravnom fakultetu Univerziteta u Beogradu, magistrirao na Pravnom fakultetu Univerziteta Michigan, a doktorat u oblasti međunarodnog prava stekao je na Univerzitetu u



Cambdridgeu. Potpredsjednik je i član Izvršnog odbora Evropskog društva za međunarodno pravo, stručni saradnik Beogradskog centra za ljudska prava, i jedan od urednika bloga *EJIL: Talk!*, bloga Evropskog časopisa za međunarodno pravo, kao i član uređivačkog odbora EJIL. Bio je pravni pomoćnik sudije Thomasa Buergenthala na Međunarodnom sudu pravde 2006/2007. godine. Objavljivao je u brojnim akademskim časopisima, uključujući *European Journal of International Law* i *American Journal of International Law*; njegove radove citirali su, između ostalog, sudije Evropskog suda za ljudska prava i Vrhovnog suda Ujedinjenog Kraljevstva, kao i Međunarodna komisija za međunarodno pravo. Bio je zastupnik ili savjetnik u predmetima pred Međunarodnim sudom pravde, Evropskim sudom za ljudska prava i Ustavnim sudom Srbije.

Dr **Rosa Aloisi** je docent na Fakultetu političkih nauka Univerziteta Trinity, gde predaje predmete međunarodna politika, međunarodno pravo i ljudska prava, kao i međunarodna krivična pravda. Dr Aloisi bavi se istraživanjem u oblasti rada međunarodnih krivičnih sudova, institucija ljudskih prava i razvoja međunarodnog krivičnog prava. U najnovije vrijeme bavi se istraživanjem uloge međunarodnih sudija u razvoju međunarodnog krivičnog prava i prevenciji genocida i kršenja ljudskih prava. Dr Aloisi takođe radi na projektima vezanim za rodno nasilje počinjeno u vrijeme sukoba i memorijalizaciji međunarodne pravde. Njeni naučni radovi objavljeni su u časopisima *Judicature*, *International Criminal Law Review* i *Journal of Conflict Resolution*.

Jacqueline R. McAllister doktorirala je političke nauke na Univerzitetu Northwestern u junu 2014. Takođe je diplomirala, *cum laude* i *Phi Beta Kappa*, na koledžu Wellesley. Njeno trenutno istraživanje usredsređeno je na pitanje da li, kako i kada međunarodni krivični sudovi utiču na nasilje protiv civila i izgleda za mir. Njen rad oslanja se na obimne arhivske podatke i razgovore prikupljene širom Nizozemske i jugoistočne Evrope (konkretno u Hrvatskoj, Bosni i Hercegovini, Kosovu, Srbiji i Makedoniji). Nedavno je dobila američku Fulbrightovu stipendiju kako bi okončala projekat knjige u vezi s uticajem Međunarodnog krivičnog suda za bivšu Jugoslaviju tokom rata. Nacionalna fondacija za nauku, Američko udruženje univerzitetskih radnica i Američko vijeće naučnih društava dodatno su podržali njeno istraživanje. Do sada, Jacqueline je objavljivala u časopisima *Foreign Affairs* i *American Journal of International Law*. Predaje na kursevima iz oblasti međunarodnih odnosa, međunarodnih organizacija, tranzicione pravde, ljudskih prava i građanskih ratova.

Dr. **Janine Natalya Clark** je vanredna profesorica na predmetima rodne studije, međunarodno krivično pravo i tranziciona pravda na Pravnom fakultetu Univerziteta u Birminghamu, Ujedinjeno Kraljevstvo. Njeno istraživanje bavi se tranzicionom pravdom, međunarodnim krivičnim sudovima, seksualnim nasiljem u sukobu i pomirenjem. Na terenu u bivšoj Jugoslaviji radi od 2002. godine i objavila je veliki broj radova. Njena najnovija knjiga (*Rape, Sexual Violence and Transitional Justice Challenges: Lessons from Bosnia-Herzegovina*) izlazi u septembru 2017. Pored tri knjige, napisala je i skoro 50 članaka objavljenih u naučnim časopisima. Njen rad finansiraju britanski Savjet za ekonomska i društvena istraživanja i fondacija Leverhulme. Nedavno je dobila *Consolidator* stipendiju Evropskog istraživačkog savjeta za petogodišnji komparativni projekt o otpornosti i oporavku preživjelih žrtava silovanja u ratu i seksualnog nasilja u Bosni i Hercegovini, Kolumbiji i Ugandi.

Robert (Bob) Reid radi u Tužilaštvu MKSJ-a od juna 1994. Obavljao je funkcije vođe istražnog tima, rukovodioca istraga, zamjenika šefa Istražnog odjeljenja, zamjenika šefa Odjeljenja



za krivično gonjenje, a sada je šef Operativnog odjeljenja. Prije svog dolaska u Tužilaštvo, radio je u policiji u Novom Južnom Velsu (Australija).

Alan Tieger tri decenije radi na istraživanju i krivičnom gonjenju teških kršenja međunarodnog i nacionalnog prava o ljudskim pravima. Služio je kao savezni tužilac u Ministarstvu pravosuđa Sjedinjenih Država, gdje je radio na istraživanju i krivičnom gonjenju u predmetima rasnog nasilja i brutalnosti policije širom Sjedinjenih Država, uključujući uspješno okončan savezni krivični postupak protiv pripadnika policije u predmetu *Rodney King*. Bio je u prvobitnoj grupi tužilaca i istražitelja na MKSJ-u i služio je kao tužilac u prvom predmetu pred MKSJ-om, *Tužilac protiv Tadića*. Kao viši zastupnik optužbe na MKSJ-u, specijalizovan za predmete rukovodstva, g. Tieger je vodio istrage i krivično gonjenje visokih političkih i vojnih rukovodilaca, pored ostalog u predmetima *Tužilac protiv Karadžića*, *Tužilac protiv Mladića*, *Tužilac protiv Krajišnika*, *Tužilac protiv Plavšić* i *Tužilac protiv Gotovine i drugih*.

Kweku Vanderpuye je viši zastupnik Tužilaštva Međunarodnog krivičnog suda u prvostepenim postupcima. Nedavno je završio rad na prvostepenom postupku u predmetu *Tužilac protiv Bembe i drugih*, i trenutno predvodi istragu u vezi sa Situacijom II u Centralnoafričkoj Republici. Kweku je došao na Međunarodni krivični sud sa Međunarodnog krivičnog suda za bivšu Jugoslaviju, gdje je obavljao funkciju zastupnika Tužilaštva u prvostepenim postupcima u predmetima *Tužilac protiv Popovića i drugih*, *Tužilac protiv Zdravka Tolimira* i *Tužilac protiv Ratka Mladića*. Prethodno je radio kao advokat odbrane u krivičnim predmetima u New Yorku, između ostalog i kao viši zastupnik u Udruženju za besplatnu pravnu pomoć. Kweku je diplomirao pravo na Kalifornijskom univerzitetu, Pravni koledž Hastings, i autor je nekoliko članaka o međunarodnom krivičnom pravu.

Gordana Tadić, vršilac dužnosti glavnog tužioca Tužilaštva Bosne i Hercegovine, diplomirala je na Pravnom fakultetu Univerziteta u Sarajevu 1985. godine, a pravosudni ispit je položila 1995. Nakon što je diplomirala i do 1996. godine bila je na više funkcija u privredi. Od 1996. do 2003. godine bila je na funkciji zamjenika opštinskog tužioca u Živinicama, a od 2003. do kraja 2011. radila je u Kantonalnom tužilaštvu u Tuzli. Od početka 2012. do decembra 2013. bila je na funkciji zamjenika kantonalnog tužioca Tuzlanskog kantona. Za glavnog tužioca Tužilaštva Bosne i Hercegovine imenovana je odlukom Visokog sudskog i tužilačkog vijeća Bosne i Hercegovine 20. novembra 2013.

Marie O'Leary je trenutno zastupnik Službe za podršku odbrani (OPCD) na Međunarodnom krivičnom sudu. Prethodno je radila u timovima odbrane Nasera Orića, Vlastimira Đorđevića, Milana Lukića (predmet *Lukić i Lukić*) i Dragomira Pećanca na MKSJ-u. Takođe je radila za *amicus curiae* tužioca za žalbeni postupak za nepoštovanje Suda (II) u predmetu protiv Šešelja i kao niži sudski savjetnik Pretresnog vijeća II MKSJ-a. Godine 2010, O'Leary je radila kao pravni konsultant Ureda za odbranu na STL-u. Bila je šef Ureda Udruženja branilaca koji postupaju pred MKSJ od 2006. do 2007. godine, a trenutno je potpredsjednik Udruženja i član Komisije za obuku. O'Leary je takođe predavač Seminara o međunarodnoj krivičnoj odbrani na Međuregionalnom institutu Ujedinjenih nacija za istraživanje zločina i pravde, a predavala je i na Ljetnoj školi međunarodnog krivičnog prava Centra Grotius Univerziteta u Leidenu.

Sudija prof. dr **Wolfgang Schomburg** studirao je pravo na Slobodnom univerzitetu u Berlinu, a profesionalnu karijeru započeo je 1974. godine kao javni tužilac, sudija i viši javni tužilac u nekadašnjem Zapadnom Berlinu. Od 1989. do 1991., bio je državni podsekretar pri Odjeljenju za



pravosuđe Senata u Berlinu za vreme njegovog ujedinjenja. Od 1995. do 2000. godine, bio je krivični sudija Saveznog suda pravde Njemačke (Bundesgerichtshof). Od 2001. do 2008., Schomburg je bio predsjedavajući sudija Pretresnog vijeća II MKSJ-a, a zatim sudija Žalbenog vijeća MKSJ-a i MKSR-a. On je prvi njemački sudija na nekom međunarodnom krivičnom sudu. Godine 2008., njemački predsjednik mu je dodijelio Orden za zasluge Savezne Republike Njemačke. Od 2009. počasni je profesor Univerziteta u Durhamu, a 2013. mu je dodijeljen počasni doktorat iz oblasti građanskog prava. Redovno je objavljivao knjige i članke o međunarodnom pravu, a od 1983. je urednik i koautor vodećeg njemačkog komentara iz oblasti međunarodne saradnje u krivičnim stvarima *International Cooperation in Criminal Matters*.

Jasmina Pjanić Njuhović je direktorica Odsjeka kaznene odbrane (OKO) Ministarstva pravde Bosne i Hercegovine, zaduženog za pružanje podrške radu Suda BiH u procesuiranju teških kršenja ljudskih prava i humanitarnog prava tokom 1990-ih. Prije dolaska u državnu službu u julu 2009., Jasmina Pjanić bila je savjetnica i konsultant u Jedinici za reformu krivičnih institucija i tužilaštava Ureda visokog predstavnika (OHR) za BiH, glavne agencije za implementaciju civilnih aspekata mirovnog sporazuma u zemlji. Radila je na projektu osnivanja Odjeljenja za podršku odbrani pri Vijeću za ratne zločine Suda BiH. Takođe je radila kao sekretar Ustavnopravne komisije Doma naroda Parlamentarne skupštine BiH. Jasmina Pjanić je dobitnica nekoliko stipendija, diplomirala je pravo na Pravnom fakultetu Univerziteta u Sarajevu, a magistrirala na temu Demokracija i ljudska prava u Jugoistočnoj Evropi na Univerzitetu u Bolonji i Univerzitetu u Sarajevu.

Vasvija Vidović je advokat iz Bosne i Hercegovine s pravnim iskustvom kako pred domaćim, tako i pred međunarodnim ustanovama, a specijalnost su joj međunarodno pravo, krivično pravo i ljudska prava. Sedam godina radila je kao imenovani sudija u krivičnim predmetima na Osnovnom sudu u Sarajevu i bila je predsjednik Krivičnog odjeljenja. Bila je izabrani sudija Krivičnog odjeljenja Okružnog suda u Sarajevu. Godine 1994. radila je za vladu BiH, kao zamjenik ministra pravde. Potom je bila ministar savjetnik u ambasadama BiH u Briselu i Hagu. Vasvija Vidović je takođe bila član međunarodnog tima pravnika koji su zastupali BiH pred Međunarodnim sudom pravde u postupku povodom tužbe protiv Jugoslavije za kršenja Konvencije o genocidu. Na MKSJ-u je bila imenovani branilac Mehmeda Alagića, Rasima Delića i Nasera Orića. Pred okružnim sudom u Oslu (Norveška) bila je branilac Mirsada Repaka. Trenutno postupa kao branilac u predmetima na Državnom sudu BiH, kantonalnim sudovima, Vrhovnom sudu Federacije i RS, te drugim sudovima u BiH. Vodi advokatsku kancelariju u Sarajevu i zastupa stranke u pitanjima organizovanog kriminala i građanskog prava, a savjetnik je i za pitanja primjene međunarodnog humanitarnog prava i ljudskih prava. Autor je više publikacija o ratnim zločinima, krivičnom pravu, ljudskim pravima i krivičnim postupcima. Nedavno je bila uključena u aktivnosti vezane za osnivanje međunarodnog suda za ratne zločine počinjene u Siriji.

Tomislav Višnjić je branilac u krivičnim postupcima iz Srbije, gdje trenutno brani stranke pred Odeljenjem za ratne zločine Višeg suda u Beogradu. Bio je branilac više optuženih pred MKSJ-om, uključujući Miroslava Tadića, Radislava Krstića, Predraga Banovića, Dragoljuba Ojdanića i Milana Lukića. Diplomirao je pravo na Pravnom fakultetu Univerziteta u Beogradu i advokaturom se bavi od 1986. Takođe je uvršten u Spisak branilaca Međunarodnog krivičnog suda (MKS).

Kate Mackintosh obavlja dužnost zamjenika sekretara Međunarodnog krivičnog suda za bivšu Jugoslaviju od 2012. Karijeru na MKSJ-u je započela 1998., kao pravni saradnik sudije



Cassesea, nakon čega je radila i za tužilaštvo i za odbranu. Gđa Mackintosh ima više od 20 godina iskustva u međunarodnom krivičnom pravosuđu, ljudskim pravima i humanitarnim poslovima. U periodu od 2003. do 2011., radila je za organizaciju Ljekari bez granica, prvo kao savjetnik za međunarodno pravo, a posljednje četiri godine kao šef odjeljenja za humanitarne poslove. Njeno ranije iskustvo uključuje rad u Sarajevu, gdje je bila viši pravni savjetnik Misije OEBS-a u Bosni i Hercegovini, u Ruandi, gdje je bila terenski savjetnik za ljudska prava pri Visokom komesarijatu za ljudska prava, kao i privatnu pravnu praksu u Ujedinjenom Kraljevstvu. Njene publikacije bave se primjenom međunarodnog prava na dileme humanitarnog djelovanja i zaštitu civila, kao i odnosom između humanitarnog djelovanja i krivičnog pravosuđa.

Gospođa **Jasna Zečević** počela je rad u U.G. Vive Žene od njegovog osnivanja 1994. godine, kao pomoćnica glavnog koordinatora Vive Žene i kao tumač na sesijama terapije. Nakon što je preuzela poziciju predsjednice U.G. Vive Žene 1996. godine, Jasna Zečević je za veoma kratko vrijeme uspjela da izgradi interni kapacitet organizacije i da podigne standarde rada s ciljem da se odgovori na potrebe ranjivih grupa koje su obuhvaćene programima ovog udruženja. Jak karatker gđe Zečević, njena posvećenost radu, te izuzetne komunikacione sposobnosti stvorile su prepoznatljiv profil U.G. Vive Žene, koji je prepoznat i cijenjen širom svijeta. Njene izuzetne sposobnosti lobiranja i umrežavanja su uvijek imale za cilj dobrobit ljudi kojima je posvetila svoj rad: žrtava trauma i mučenja, te drugih marginalizovanih i ranjivih grupa. Uvijek je bila zagovornik važnosti solidarnosti, saradnje i međusobne podrške i zaštitnik i zagovornik ljudskih prava. Gospođa Zečević je svjedočila pred MKSJ-om kao svjedok vještak (u predmetu *Krstić*, 2000. godine).

Dr **Kimi Lynn King** je redovni profesor na Univerzitetu Sjevernog Teksasa (UNT). Zajedno s partnerom, dr. Jamesom Meernikom, ona od 2003. posjećuje Haag, rukovodeći nastavnim programima u inostranstvu i vršeći istraživanja u vezi s Međunarodnim krivičnim sudom za ratne zločine u bivšoj Jugoslaviji (MKSJ). Njihov nastavni program u inostranstvu osvojio je nagradu za najinovativniji kurs za 2007. godinu, koju dodjeljuju Američko udruženje za političke nauke i Rowman & Littlefield, a to je bio jedan od prvih programa u svijetu koji je doveo studente i dodiplomskih i postdiplomskih studija na MKSJ u sklopu nastavnog programa. U saradnji sa Službom za žrtve i svjedoke MKSJ-a, oni su sproveli najanalitičnije sveobuhvatno istraživanje do sada o kratkoročnim i drugoročnim posljedicama svjedočenja po svjedoke pred Međunarodnim sudom. Ti rezultati predstavljeni su širom bivše Jugoslavije (u Bosni, Hrvatskoj, na Kosovu i u Srbiji), kao i na MKSJ-u u Haagu u junu 2016. Istraživački interesi dr King bave se ulogom prava u rješavanju sukoba, a objavila je radove o širokom nizu tema, uključujući ljudska i građanska prava, međunarodno pravo, donošenje odluka na američkom Vrhovnom sudu i vanjsku politiku, rodne studije i seksualno nasilje. Redovni je dopisnik medijskih kuća za političke novosti, bavi se razvojem pedagoškog sadržaja za univerzitetske izdavače, i jedan je od osnivača Američkog udruženja za *moot court* takmičenja (nacionalna organizacija studenata prava i aktivista). Najveći ponos njene saradnje s dr Meernikom je njihova trinaestogodišnja kćerka Marlene, koja ih svakodnevno podsjeća zašto je važno ostaviti svijet boljim nego što si ga zatekao. Predaje na Univerzitetu Sjevernog Teksasa od 1993.

Helena Vranov Schoorl, diplomirani socijalni radnik, diplomirani psiholog, trenutno radi u Jedinici za podršku i zaštitu svjedoka Mehanizma za međunarodne krivične sudove, Ogranak u Haagu. Od 2001. godine radila je u Službi za žrtve i svjedoke Međunarodnog suda za bivšu Jugoslaviju (MKSJ), gdje je bila zadužena za sveobuhvatnu koordinaciju i rukovođenje u vezi s pružanjem praktične i psihosocijalne podrške žrtvama i svjedocima u Haagu i u Kancelariji u Sarajevu. Tokom tog perioda stekla je dragocjen uvid u različite faze "putovanja radi svjedočenja"



svjedoka (prije, tokom i poslije svjedočenja) u pravnom kontekstu. Prije zaposlenja na MKSJ-u, radila je tokom skoro dvije godine sa ženama i djecom u skloništu od nasilja u porodici u Nizozemskoj.

Alma Taso Deljković od 2005. godine radi sa svjedocima/žrtvama u Odjelu za podršku svjedocima Suda BiH. Pored pružanja neposredne podrške svjedocima pred Sudom, ona je tokom tog perioda ustrajno zagovarala razvoj i unapređenje sistema za podršku svjedoka u pravosuđu BiH i drugdje, promovisala prava svjedoka/žrtava, te omogućavala dijalog i komunikaciju s lokalnim zajednicama u vezi s potrebama i pravima žrtava/preživjelih/svjedoka. Kao magistar psihologije s dodatnom specijalizacijom iz oblasti liječenja psihološke traume i porodičnog savjetovanja, ona u svom svakodnevnom radu koristi svoja znanja i vještine kako bi pomogla svjedocima da kroz proces svjedočenja prođu što je moguće bezbolnije. Godine 2015. nominovana je u ime Bosne i Hercegovine za člana Upravnog odbora Fondacije za žrtve Međunarodnog krivičnog suda (ICC TFV). Alma živi i radi u Sarajevu, Bosna i Hercegovina.

Carsten Stahn je profesor međunarodnog krivičnog prava i globalne pravde i direktor Programa za međunarodne studije Centra Grotius (u Haagu). Prethodno je radio kao naučni saradnik u Institutu Max Planck za komparativno javno pravo i međunarodno pravo (2000.-2003.), kao sudski savjetnik Vijeća Međunarodnog krivičnog suda (2003.-2007.) i kao predavač međunarodnog javnog prava i međunarodnog krivičnog pravosuđa na Univerzitetu Swansea. Titulu doktora (*summa cum laude*) stekao je na Univerzitetu Humboldt u Berlinu, nakon što je položio Prvi i Drugi stručni državni ispit za pravnike u Njemačkoj. Titule magistra je stekao na Univerzitetu u New Yorku i na univerzitetima Köln/Paris I (Panthéon-Sorbonne). Među njegovim najskorijim knjigama su *Contested Justice* (CUP 2015.) i *The Law and Practice of the International Criminal Court* (OUP 2014.).

Harmen van der Wilt je profesor međunarodnog krivičnog prava na Pravnom fakultetu Univerziteta u Amsterdamu. Njegovi istraživački interesi vezani su za koncepte krivične odgovornosti u međunarodnom krivičnom pravu; procesuiranje međunarodnih zločina na nacionalnom nivou, pravno reagovanje na terorizam, međunarodno krivično pravo i pravnu filozofiju, istoriju u sudnici, evropske naloge za hapšenje i transnacionalna krivična djela. Van der Wilt je učestvovao u programima profesionalne obuke za sudije i javne tužioce u Adis Abebi i programima obuke za mlađe osoblje Univerziteta Lobačevskog u Nižnjem Novgorodu u Rusiji. Član je uređivačkih odbora *Journal of International Criminal Justice*, *Nizozemskog godišnjaka međunarodnog prava* i vodećeg nizozemskog časopisa za krivično pravo *Delikt en Delinkwent*. Bio je član Istraživačkog savjeta projekta EU(F7) u vezi s evropskim nalogom za hapšenje i član Upravnog odbora DOMAC (uticaj međunarodnih sudova na postupke u slučajevima masovnih zločina na nacionalnom nivou). Van der Wilt je bio sudija *ad litem* Krivičnog suda u Roermondu, a trenutno je *ad litem* sudija u Vijeću za ekstradicije Okružnog suda u Amsterdamu. Izlagao je svoja istraživanja širom svijeta u brojnim prilikama i vršilac je dužnosti predsjednika Fondacije Nino Cassese.

Thijs Bouwknecht je historičar, pravnik i bivši novinar, specijalizovan za političke tokove na afričkom kontinentu, međunarodnu krivičnu pravdu, tranzicionu pravdu i proučavanje genocida. Istraživač je nizozemskog Instituta za proučavanje rata, holokausta i genocida, kao i docent na Univerzitetu u Amsterdamu (UvA) i Univerzitetu u Utrehtu (UU). Od 2003. godine, Thijs je prisustvovao suđenjima, pratio ih i izvještavao sa njih pred međunarodnim sudovima za bivšu



Jugoslaviju (MKSJ) i Ruandu (MKSR), Specijalnim sudom za Sijera Leone (SCSL), Vanrednim vijećima u Sudovima Kambodže (ECCC), Specijalnim sudom za Liban (STL), Međunarodnim krivičnim sudom (MKS) i nizom nacionalnih sudova u Evropi i Africi. Takođe je radio kao istraživač na MKSR-u i MKS-u.

Magistar **Iva Vukušić** doktorski je kandidat u projektu pod naslovom 'Paramilitarizam, organizovani kriminal i država' na Odjeljenju za istoriju Univerziteta u Utrehtu. Njena istraživanja usredsređena su na bivšu Jugoslaviju 1990-ih. Takođe je povezana s Institutom za studije rata, holokausta i genocida u Amsterdamu. Od 2009. do 2015. godine, Iva je radila za novinsku agenciju SENSE u Haagu, prateći suđenja na Međunarodnom krivičnom sudu za bivšu Jugoslaviju (MKSJ). Prije toga, bila je analitičar i istraživač pri Odjeljenju za ratne zločine Državnog tužilaštva u Sarajevu. Iva je radila na projektu koji je bio usredsređen na vizuelni materijal na suđenjima za ratne zločine, na Odjeljenju za ratne studije Kraljevskog koledža u Londonu, saradivala je na istraživanjima u vezi sa pravosudnim reakcijama na masovno nasilje i njihovim uticajem na postkonfliktna društva i šire, i pisala o izazovima na području tranzicione pravde. U posljednje vrijeme, veliki dio njenog rada usredsređen je na pravosudne opcije u Siriji. Među ranijim napisima je članak o arhivama MKSJ-a u britanskom časopisu *History* (Wiley-Blackwell, 2013.), poglavlje u publikaciji *Prosecuting War Crimes: Lessons and Legacies of the ICTY* (Routledge, 2014.), te poglavlje u publikaciji *State-Building and Democratization in Bosnia and Herzegovina* (Ashgate, 2015.).

Andy Aydın-Aitchison je vanredni profesor na Pravnom fakultetu Univerziteta u Edinburghu. Više od deset godina se bavio istraživanjem u oblasti tranzicione pravde i genocida, ratnih zločina i zločina protiv čovječnosti u Bosni i Hercegovini. On u svojoj knjizi *Making the Transition* (2011.), zasnovanoj na doktorskoj disertaciji podnesenoj na Univerzitetu Cardiff, ispituje odnos između tranzicije, reforme sistema krivičnog pravosuđa i državotvornosti u Bosni u periodu od 1995. do 2005. U svom skorijem radu usredotočio se na primjenu kriminoloških metoda i teorije na ratne zločine, a trenutno radi na korištenju transkripata i dokaza MKSJ-a u svrhu objašnjavanja uloge koju je odigrala policija u genocidu, ratnim zločinima i zločinima protiv čovječnosti u bivšoj Jugoslaviji. Andy na magistarskim studijama predaje predmet Globalni zločini, pravda i bezbjednost, a u više dodiplomskih i postdiplomskih studija predaje genocid, ratne zločine i zločine protiv čovječnosti i tranzicionu pravdu.

Petar Finci je istraživač, pisac i režiser u *Outreach* programu Međunarodnog krivičnog suda za bivšu Jugoslaviju u Haagu. Od 2002. do 2009. godine radio je u Tužilaštvu MKSJ-a, a prije toga kao novinar i urednik u Nizozemskoj i Bosni i Hercegovini. Finci je napisao i koproducirao šest dokumentarnih filmova o radu MKSJ-a, od kojih je četiri i režirao. Njegov posljednji film, *Apsolutna zabrana: zločin mučenja pred MKSJ*, biće premijerno prikazan u junu 2017. na Konferenciji o naslijeđu u Sarajevu.

Saranda Bogujevci je rođena 12. juna 1985. Ona je umjetnica i aktivista za pravdu i ljudska prava. Gđa Bogujevci je diplomirala na Univerzitetu u Manchesteru, Velika Britanija. Posljednje tri godine radi kao direktorica Odjeljenja za kulturu, omladinu i sport Opštine Priština, pod rukovodstvom gradonačelnika Shpenda Ahmetija. Saranda je koautor porodične izložbe "Bogujevci - vizuelna istorija", koja je imala veliki uspjeh tokom postavki na Kosovu, u Albaniji i u Srbiji. Za vrijeme rata na Kosovu, Saranda je teško povrijeđena prilikom masakra u Podujevu, u kojem je izgubila veliki dio porodice.



Saranda Bogujevci je 2003. godine u Velikoj Britaniji dobila međunarodnu nagradu za moralnu hrabrost "Anna Frank".

Nataša Kandić je posvećena aktivizmu za zaštitu ljudskih prava još od studentskih dana. Većina njenih projekata i aktivnosti su sprovedene kroz Fond za humanitarno pravo (u Srbiji), koji je osnovala 1992. godine, i Fond za humanitarno pravo Kosova, koji je postao nezavisna organizacija 2010. godine. Trenutno je koordinatorka regionalnog procesa za utvrđivanje činjenica i pomirenje poznatog pod nazivom Inicijativa za REKOM, koji se bavi ljudskim gubicima tokom ratova na području bivše Jugoslavije. Njen rad je imao snažan uticaj na lokalnom nivou i dobio je brojna međunarodna priznanja.

Dr **Dennis Gratz** je rođen 1978. godine u Sarajevu. Diplomirao je 2001. godine na Pravnom fakultetu Univerziteta u Sarajevu, a titulu magistra iz oblasti Demokratije i ljudskih prava stekao je 2002. godine u Centru za interdisciplinarnu postdiplomske studije Univerziteta u Sarajevu i na Univerzitetu u Bolonji. Dr Gratz je stekao titulu doktora na Fakultetu društvenih nauka Univerziteta u Hamburgu. Dr Gratz je suosnivač Naše stranke, socijalno liberalne, multietničke političke stranke u Bosni i Hercegovini. Na izborima u oktobru 2014. izabran je za zastupnika u Parlamentu Federacije Bosne i Hercegovine. Trenutno služi kao predsjednik Glavnog odbora Naše stranke.

Mirko Klarin profesionalno se bavi novinarstvom od 1966. godine. Izvještavao je o spoljnoj politici, uglavnom o bliskoistočnom konfliktu, evropskim političkim tokovima i političkom nasilju (terorizmu). O radu MKSJ-a izvještava od njegovog osnivanja 1993. Od 1998. glavni je urednik specijalizovane medijske agencije SENSE-Tribunal, koja redovno prati rad MKSJ-a i drugih međunarodnih sudova sa sjedištem u Haagu. Tokom proteklih bezmalo 20 godina, o radu MKSJ-a i činjenicama utvrđenim na suđenjima u produkciji agencije SENSE-Tribunal objavljeni su informativni izvještaji, TV prilogi, dokumentarni filmovi i internetske prezentacije. U oktobru 2017. SENSE će otvoriti Dokumentacijski centar za tranzicijsku pravdu u Puli (Hrvatska).

Ambassador Wigemark je diplomirao na Univerzitetu Harvard 1984. godine i ima magistraturu iz međunarodnog prava i ekonomije sa Fakulteta za pravo i diplomatiju Fletcher. U Ministarstvu spoljnih poslova Švedske radi od 1988. godine i službovao je u Beogradu, Washingtonu, Briselu, Kabulu i Moskvi, gdje je bio na položaju ministra i zamjenika šefa misije Ambasade Švedske (2003.-2007.). Ambassador Wigemark je 2008. imenovan za šefa Odjela za sigurnosnu politiku Evropske komisije. Od februara 2011. do marta 2015. obavljao je funkciju ambasadora i šefa Delegacije Evropske unije u Pakistanu. Od aprila 2015. godine, ambasador Lars-Gunnar Wigemark je šef Delegacije Evropske unije u Bosni i Hercegovini i specijalni predstavnik Evropske unije u Bosni i Hercegovini.

Miguel de Serpa Soares je imenovan za pomoćnika generalnog sekretara Ujedinjenih nacija za pravne poslove i pravnog zastupnika Ujedinjenih nacija u septembru 2013. On nadgleda rad Službe za pravne poslove Ujedinjenih nacija, čiji su opšti ciljevi da obezbjedi ujednačenu i centralizovanu pravnu službu u Ujedinjenim nacijama. Služba za pravne poslove Ujedinjenih nacija broji otprilike 200 zaposlenih, koji dolaze iz više od 60 zemalja. Gospodin Serpa Soares je 2013. godine također određen za Focal Point for Oceans Ujedinjenih nacija. Gospodin Serpa Soares ima veliko iskustvo u pravnim i međunarodnim poslovima, nakon što je svoju zemlju predstavljao u raznim bilateralnim i multilateralnim forumima, između ostalih i u Šestom komitetu Generalne



skupštine Ujedinjenih nacija, Komitetu javnih međunarodnih pravnih savjetnika Savjeta Evrope i u Skupštini država članica Međunarodnog krivičnog suda. Prije preuzimanja trenutne pozicije, bio je generalni direktor Odsjeka za pravne poslove Ministarstva spoljnih poslova Portugala od 2008. godine. Prethodno je tokom karijere radio kao pravni savjetnik Stalne misije Portugala pri Evropskoj uniji u Briselu (1999.-2008.) kao i kao šef kabineta zamjenika ministra za infrastrukturu i teritorijalnu administraciju, zadužen za pomorska pitanja. Obavljao je i funkciju predsjednika Nadzornog odbora Lučke uprave Lisabona. Bio je uključen u nekoliko zakonodavnih reformi i reformi prakse u vezi sa sektorom pomorstva.